

De Kwakel

CV de Moerebuuk
Jaorgank 50



Mèt dees daag geit de
geliekrichter ane kantj
en zètte wae piekspanning
op 't Moeërelandj'

**Prins Paul II
Prinses Joyce**

Net as bie 't voet-
en volleyballe, Gaon wae
deze Vastelaovendj knalle



**Jeugdprins Bart
Jeugdprinses Irene**



Vastelaovendj 2015

'Proklamatie'



Beste Moeëre, Moeërinne en anger aanwezige,

Ich, Prins Paul II, 64e prins vanne Moerebuuk, gebore en getoge in Èll.

Zoon van Jan van Thei vanne Bekker en Elly van Bös Pierre.

Al mieër den 13 jaor same mèt mien Prinses Joyce woeë ich mèt samewoeën in 't Spargelheukske.

Mèt dees daag biegestaon door ervaringsdeskundige; mien adjudante aod Prins Bart II, aod Prins Chris I, aod jeugdprins Robert en heur dames Marjon, Petra en Odile.

In 't dageliks laeve werkzaam in binne- en boetelandj as machinedokter veur Bosch verpakkingsmachines.

Leefste en knapste leider van JWE en vriewilliger as ein van de spoeëke bie Stichting Spook.

Nog steeds same mèt F.V. de Brandblussers teikenendj veur 't hoeëgste aantal puntje oeëts in de Èller optocht.

Wins ich uch allemaol, groeët en klein, jónk en aod, eine geweldjige vastelaovestied toe.

Ich verklaor bie de gratie van Groeëtvorst Jan, Vorst René, Vorst Henri en de Raod van Elf 't volgendje:

- Det ich same mèt mien Prinses Joyce, mien adjudante Bart, Chris en Robert en heur dames Marjon, Petra en Odile d'r alles aan zal doon óm deze vastelaovendj ónvergaetelik te make.
- Det wae dit neet allein gaon doon, mer same mèt de hieële Raod van Elf vanne Moerebuuk en ouch de Jeugdprins Bart, Jeugdprinses Irene en heur adjudante Jarno, Floor en de geweldjige jeugdraod.
- Det wae mèt dees daag 't leefst veurop zulle gaon mèt zoeëveul meugelik live blaosmuziek óm ós haer.
- Det wae veur alle moeëre en moeërinne paraat zulle staon in de vastelaovestied.
- Det ich verwacht van de rest vanne Brandblussers det ze mèt zulle doon in de Èller optocht.
- Det ich 't neet erg vinj as Harm weer ein leedje van k3 ómgjesjriefftj veur de Bóntje Aovendj.
- Det Breeven vanaaf noe tot aan aswoonsdig de Prinsestraat zal heite.
- Det ich mèt dees daag zal regere in de "Orde van de spanning(s)zeuker"

En dit alles ónger mien motto:

Mèt dees daag geit de geliekrichter ane kantj en zette wae piekspanning op 't Moeërelandj'

Èll, november 2014



Leef Moeërebuuk,

Dao stong ich den zunjigaovendj mèt Èll kirmes in ein van de Èller caffés op mien gemaak ein glaas beer te drinke toen ein van de minse van 't prinsecomité naeve mich kwoom staon en mich opins de vraag steldje of ich intresse zoj hóbbe in 't prinsesjap en det ich d'r mer ins euver nao móst dinke. Ich haaj det hieëlemaol neet verwachtj mer mien ieëste gedachte waas "jao, dao hób ich zin in!"

De zaoterdig daonao kwoom emes van 't prinsecomité 't officieel vraoge en 't antjwoord waas "jao". 's Maondjes zoj ich weer nao 't boetelandj gaon en den zoj ich aan miene baas gaon vertèlle det de kómmendje waeke veur mich get minder vol geplandj móste waere. Toen begost 't pas echt bie mich te dage det 't echt waas.

De kómmendje waeke, weit ich oet ervaring als aod adjudant, die zoeëje spannendj mer ouch veural hieël erg leuk gaon weare. Zeker ómdet de bösse veur 't prinse raoje al in de caffés stonge en d'r al versjillendje name genumtj waardje.

Wae móste nog eine houp veurbereijinge doon, mer mien adjudante en wae haje d'r al hieël veul zin in. Ich wins uch allemaol eine hieële sjeke vastelaovendj toe!

Alaaf !

Prins Paul II



Weer terecht

Wie Henri van Daniëlle ziene auto aan 't oetmèste waas, kwaam d'r ein papeer vanne Intersport tege. Mer de tekst waas neet mieër te laeze en hae kost zich ouch neet herinnere woë die bón van kost zeen. Det zaat hum neet lekker, dus hae scandje 't blaedje in en verduusterdje de instèllinge. Det wirkdje! Noe kost hae laeze det hae 8 maondj ieëre zien tennisracket haaj weggebracht óm te laote bespanne. Bie Intersport doordje 't effe ieër zien racket gevónje waas, mer gelökkig kan de veurzitter van Tell noe weer de baan op.



Wèg mèt dae kraom!

Bie de Spar ginge ze euver op eine noewe provider. 'n Paar waeke veur alles waardje aangeslote kochte ze zich ouch noew telefoons. Op ein gegaeve moment vreugtj Leon aan Toos: "Waat mó't mèt die zwarte telefoons hie oppe taofel?" Toos waas aan 't werk op 't kantoeër en reep: "Det zeen die aoj, die kinne weggegoeëdj." Leon is van 't oprume en goeëtj ze drek inne silo. Det is de óngergróndjse container bie de Spar, t'r gruuedje van 'n bubbelbad mer den veul deper. Toos wiltj de noew telefoons gaon gebroeke en vreugtj woë die zwarte zeen, woë-op Leon trots zeet: "Die höb ich dees daag weggegoeëdj." "Jeh," zeet Toos "det wore dus de noewel!"

Henj thoes haoje!

Nel Deckers is al jaore ein van de vaste artieste oppe Senioremiddig. As Mart heur de microfoon wiltj ómhange, bliektj det in heur kleid gein tesse zitte. Mart steit get te hampele en wètj neet woë hae mèt dae zender opaan mot. Mer Nel heet det snel gezeen: "Gaef mer hie, ich duuj dae waal in miene BH". Det waas de plek die Mart ouch bedacht haaj allein hae dörfdje neet.



Det geuftj de doorslaag

Mariëlle Hurkmans haaj last van water in heur noew hoes. Det kwaam van van 't wasmesjien. Det steit oppe zolder en noe kwaam 't water via de spotjes oppe badkamer ómlieëg. Zoeëj d'r ein slang zeen losgesjote? Mariëlle wètj zich geine raad en vreugtj Mart Stiene óm hulp. Mart bekiektj zich det ins good: "Ich zeen 't al, de aafveur is verstoptj. Höb se eine geter veur mich, den speul ich de leiding efkes door." Mariëlle die inne keuke sting haaj 't neet zoëë good begrepe en kumtj de zolder op mèt 'ne doorslaag. Asof 't nog neet genógt leekdje.



Janssen Humor

Jos en May haje zich ein sjoeën vakantie oetgestippeltj. Dit jaor ginge ze ins get anges doon: wanjele in Sotlandj. "Den zul se toch waal ins gaon oefene van te veure, of neet Jos? Anges krieg se blaore." "Jeh nae," zeet Jos drueg, "ich zèt de sjoon veure de televisie en zèt ein wanjelprogramma op. Den zeen ze ingeloupe ieër de vakantie begintj."

Kennel-testpannel

Liesbeth van Wim (Creemers) kreeg 'n noewe pup (hóndj). Dao most ein noew ren veur gemaaktj waere, ein mèt nachthok. Wim leet de henj flink wappere en trots reep hae Liesbeth nao boete óm 't resultaat te kómme bewónjere. Mer óm 't nachthok in te kómme, most 't bieëstje eine bocht make en volges Liesbeth waas dae bocht te sjerp. Ze heet toen ieëst oppe knieë geprobeerdj of dae bocht te make waas, veurdet 't hok goodgekeurdj waardje.

Koppien? Boekpien? Pien aanne kneuk? Slecht dr aan?
Stoppe met rauke? Gezonjer leave?

Op zeuk noa ein oplossing op natuurlikke basis?

Acupunctuur Massage
Hotstone Mens en dier
Bioresonantie NLP
Homeopathie Detox
Breathfulness Faalangst Training

Laup es binne bie Esther Hendrix, Centrum 'New Life'
Breeven 12, gratis spreakoor: maandigmurre van 8:30 tot 9:30

De Kwakel

Jaorgank 50

Bastiaan geit op vakantie

De aojers van zien vriendin Daphne deje heur same ein vakantie kado. Nao Egypte, dus vlege vanoet Schiphol. Dao aangekómme bleek det Bastiaan gein recente pasfoto haaj veur op 't visum. In zón ftohökske geprobeerdj mer 't lökdje neet. Wèg euro's en gein foto. De douane noom oeteindelijk genoeg mèt ein aoj foto van vreuger en ze mochte door. In Egypte bie de contróle bleek det Bastiaan ein geldjige identiteitskaart haaj mer gein paspoort. En zónger geldjig paspoort kum se 't landj vanne sultan neet binne. Ze zeen weer trök kónne vlege. Gelökkig deje de aojers van Bastiaan heur toen ein anger reis kado. Dao höbbe ze sjoeën foto's van bewaardj.



Moeëre-wèdstried

Bie de Spar waas 's zaoterdigs vanne Vastelaovendj 'ne wèdstried gehaoje: 'Weem meuktj 't lekkerste recept mèt moeëre?' Mariëlle van de Witte vanne Sjilder köptj ein moeër, woeë-op Toos vreugtj: "Duis se ouch mèt aan ózze wèdstried? Waat geis se make?" "Nae," zeet Mariëlle "dae is veur ózze knien". "Oh jao" zeet Toos, "dao kinse ouch gevöldje knien van make!"



Wisj dj`r al ...

- Det de Platvèsse ein weekendje wèg zeen gewaestj.
- Det Marie-José 's mörges koffie woeëj zètte en de kan paktje óm 't water in 't koffiezèttapparaat doon.
- Det ze toen vroeg wieveul kanne water ze d`rin most sjódde veur ein vol kan te make.
- Det de Raod van Elf veurig jaor ein hieël speciaal jubileum te vere haaj
- Det Jeroen Bongers toen 2x 11 jaor lid waas van dit comité
- Det wae ós aafvraoge of Jeroen rechtstreeks vanoet de jeugdraod is doorgestroumtj, of det zich emes vertyptj heet bie 't make van de oorkonde.

Hoeëge drök of kracht stroom

Hans van Linje Sjaek kwaam mèt de trein trök van get bezunjers in Indjehove. Hae haaj nog ein bietje hóngere en geit tegeneuver 't station nao binne en bestèljt zich get te aete. Hae mot ouch effe nao de WC, want de blaos is vol. "Waat gao jae doon?" reuptj de mins achter de toeënbank. "Ich gaon de cement tösse de tegels wègpisse, zoeë erg mó't ich" zeet Hans. "As det de vónke d`r mer neet vanaaf vlege.

⊙ Gae staotj inne maeterkast!"



Keuke texe

Winnie Geelen heet sinds 'n half jaor 'n noew keuke. Bie de kookplaat wore get spetters oppe moor gekómme en Winnie dacht det effe snel bie te tese. Ze duiktj de graasj in óm de vèrf te pakke, vintj al gauw dae mèt de tekst 'keuke' d'rop en vèrftj snel de plekke get bie.

't Sjeen waal get blauw....mmh.....den toch mèr de hieël moor inne tex, anges zuus se dèt straks as 't druueg is. Ouch nog get klein plekskes op die anger moor biewirke en klaor is Winnie! Wie 't later druueg waas, bleek 't toch blauw te zeen, 'n hieël anger kleur den de rest vanne moore! Ze haaj de verf vanne aoj keuke gebroektj. Later heet ze de keuke nog 'ns gans opnoew gesjilderdj...

Wie hetj det ouch alweer?

'Haastige spoed is zelden goed'

De Kwakel

Jaorgank 50



Waat gebeurtj hie?
A: polonaise veur baby's
B: teke controle
C:

*Sjoeëllein grapjes*

De kinjer van tegewoordig höbbe al gauw heur eige meining en kinne al hieël vreug get vreigele. Op 'ne daag zaat 'n oppasmoder, hieëlemaol neet de strengste, de zaak get inne gate te haoje wie 'n paar van die men heur in 't vizier kreges. David, Jeroen, Milan en Rick wore grappe aan 't make euver waat d'r oppe graafstein kumtj te staon as emes doeëd geit of as get kepot geit. Vreugtj ein van die men waat t'r op de graafstein van ein poetsvrouw kumtj te staon. "Opgeruumdj steit netjes," waas 't antjwoord. "En waat kumtj d'r den op te staon as de computer 't begeuftj?" reuptj ein van die jóng. Dao wist de rest ouch waal get op: "Game over!" Toen keek ein van die men nao die oppasmoder en vroog welke tekst die oppe graafstein zoeëj krieges. Wae wete 't noe: "Hooft noeëts mieër op te lètte." Dudelikke taal liektj ós.

Woeë kan det noe ligge?

Prins Luuk 1e waas verhoestj en haaj gooj hulp gatj van ederein. Hae kreeg veul aanloup en al zien spulle haje ein plaetske gekreges. Wie d'r ziene Prinsesteek nuuedig haaj ómdet t'r Ellaaf móst opene kost t'r die muts nörges vinje. Al aafgezócht en ederein d'r biegehoojdj mer nörges. De prinses de sjöldj gegaeve, zien vrinj haje 't zeker gedaon, waas mam missjien ins komme helpe mèt oprume (den bes se zoeë wie zoeë alles kwiet) 't holp allemaol niks. Zien derm begoste te wirke vanne zenuwe en wie d'r veur de lèste kieër alles ein veur ein aafleep kwaam hae d'r bie oet. Inne woeënkamer, in de sjoëne antieke koffer, dae dao puur stóng veur de sier, dao-in zaat steek, witte haose, strikske, effeng alles waat se drek most kinne pakke as se 't nuuedig höbst as Prins!



Henderikx
Vastelaovendj Same! UW GROENE vakwinkel
Weverstraat 5A 6013 RA HUNSEL Tel.: 0495-786807
ALLES VOOR DHZ, TUIN & DIER

Veur Frans spraeke mèt lef:
Jan van Meister Zef
Custers Taaladviezen

*'t Is noe 1 - 1*

't Aafgeloupe WK voetbal haaj weer veul verassinges in petto. Ein daovan waas de oetslaag Spanje - Nederlandj: 1-5 mer leefst. Goje start van 't toernooi veur ós jónges en Spanje zwaor aangeslage, die móste nog behuuerlik ane bak in de kómmendje twieë poulewèdstrieje. Daags nao dae legendarische wèdstried ging Ana van Paul nao de Spar. Óngerweeg móst ze al 'n paar kieër oetlègge wie det toch kost det Spanje 't zoeë haaj laote afwete. Minder leuk mer good, wie ze bie de Spar weer nao boete kwaam sting Siem ane euverkantj vanne straot tege de gevel zich get oet te röste. Innegang reuptj tjr nao Ana: "Noe zul se waal genógt höbbe mèt twieë toete chips, gna..gna..gna.." Hae bedoeldje nateurlik det Spanje nao die twieë poulewèdstrieje waal kost inpakke mèt waat ze haje laote zeen (later bleek dae bujel dus ouch nog geliek te krieges). Ana snapdje 't waal mer waas neet hieëlemaol oet 't veldj geslage en reep trök: "In 2010 had je niet zoveel praatjes, ha..ha..ha.." Wae teikene de standj op: Ana - Siem: 1 - 1

'Optocht oetsleeg'

WAGES



VV de Vervaelers
1e pries mè 140 puntje

- 2e pries mè 140 puntje: "Wae zeen 3 daag van de kaart"
- Sjutterie Kei Kepot
- 3e pries mè 134,5 puntje: "Missjen komme wae. ..."
- Platvesse met Kuut

KLEIN GROEPE



Hub Willekens
1e pries mè 131 puntje

- 2e pries mè 124 puntje: "De dokter heet gezacht" - Peter Seerden
- 3e pries mè 117 puntje: "De Zaodcel" - Peter Willekens

Wisselbeker

VV EUNJ

1e pries mè 145,5 puntje

2e pries mè 139,5 puntje: "Met dees daag tikke wae neet"

- VV Panaaf

3e pries mè 132,5 puntje: "VV Eine Chaos" - De Moeërehieëpe

GROEËTE GROEPE



Golden Girls

1e pries mè 132,5 puntje

2e pries mè 127 puntje: "Zonger Noud zeen wae niks" - Rick en Gert-Jan

3e pries mè 126,5 puntje: "Wae blieve aan de gróndj. ..." - Plekkers

EINZELGÄNGERS



'Koffie bie de vorst'

De Kwakel
Jaorgank 50

Veur mich zitj aod-prins Luuk I, de 63e prins vanne Moerebuuk. Aafgeloupe jaor in ózze Èller vastelaovendj veurop gegange en biegestange door zien prinses Robin, same mèt heur adjudante Tim, Rick, Noud en adjudant dame Fé. Aan 't begin van ein noew vastelaovendjseizoen wil ich toch nog van ózze kersverse aod-prins wete wie d'r 't belafdj heet aafgeloupe jaor en stèl 'm daoróm get moeilikke vraoge. leest pakke wae ós ein lekker tas koffie en ein stökske appeltaart.



Prins Luuk, waat is dich 't meiste bie gebleve van 't aafgeloupe vastelaovendjseizoen:

Nou Henri, det zal ich dich 'ns in 't kort oetlègge. De Raod van 11 enne dames höbbe achter de sjerme völ dinger gedaon en meist zeen det dinger waat minse van boete-aaf neet zeen. Ich höb echt waardering veur deze groep en wil heur nogmaals bedanke veur alle steun. Mich veel 't echt op des se alle laeftieje oppe bein höbst mèt die daag. Neet allein jeugd mer ouch de belaege Moeërebuuk die mèt dich fieëste tot 't inj, geweldjig toch?!

Besjrief 'ns waat se veuldjes mèt de optocht dao bove oppe prinsewage?

Dju, waat is det hoeëg, en dao höb ich 't neet zoeë op, huuegdje... Mer de optocht begost te trèkke en den wil se eigelik allein nog mer hoeëger en hoeëger, waat ein sjiek gevoel. Doe zuust de hieële optocht veur dich oet trèkke vanoet de wage, ein ónbesjriefelik gevoel. En waat ruig des se bie minse kinst binne gape.

Dink se achteraf oeëts: "Det haaj ich nog wille zègge of mètmake?" Waat is det den?

Eigelik höb ich precies gedaon waat ich haaj wille doen. Ich höb gezagt waat ich haaj wille zègge. Ich höb nörges spiet van.

Wèt se nog mèt weem se veur die daag 'n serieus gesprek höbst gatj en woeë ging det euver?

Ich haaj veur 't oetkómme ein gesprek mèt mam op miene verjaordag euver weem in Èll prins zoj waere. Mam haaj gein idee en waas binne de familie de enige die 't nog neet wist. Achteraaf waas de verrassing veur ós mam 't allergroetst.

Luuk, ich wil dich en de hieële groep gaer bedanke veur 'n fantasties vastelaovendjseizoen. Wae höbbe van uch as groep en veural dich as prins erg genote. Dich woors 'ne prins mèt eine aanstaekelikke glimlach, dae meinig moeërehertje veur zich heet weite te winne. Bedanktj ouch aan de Raod van 11 en de dames, in 't speciaal Frans en Gerda, Jeroen en Claudia die de Raod van 11 helaas höbbe verlaote. Bedanktj veur alle fijn jaore en de groeëte inzèt van uch allemaol.

Dao mótt eine persoeën of groep zeen dae dich echt opgevalle is, op welke meneer den ouch. Weem is det en woeërom?

Eigelik ederein, mèt de Bóntje Aovendj en tiejes de optocht zeen d'r sjieke dinger veur mich gedaon, ich bèn euveral mèt muziek binne kinne trèkke en as prins de hieële vastelaovendj door ederein inne watte gelagd. Alle Moeërebuuk vele mich op!

As se 't nog 'ns euver kost doen, deet se 't den en wie?

Nog 'ns euverdoon? Jao, zónger twiefel. Mer den goof ich mien ouge en oeëre nog baeter de kost óm alle klein dinger die ich door drókdje mesjien gemistj höb, of neet höb kinne opslaon, nog 'ns te belaeve.

Waas, achteraf bekeke, de keus vanne adjudante good, of haat se baeter angere kinne vraoge?

't leëste waat ich dacht wore 'de adjes' die 't ouch mèt ós meugelik höbbe gemaaktj, die höbbe mich zeker neet teleur gesteldj. Zónger heur waas 't neet gelóktj.

Zeen d'r momente gewaestj die se lever neet, of op ein anger meneer, haats wille belaeve, tegevallers of zoeëget?

't Allerleefst haaj ich miene scepter wille haoje, mer jeh...

Waat zoot se de noewe prins as advies wille mètgaeve?

Geniet van eder moment, det klinktj cliché mer 't is echt zoeë snel veurbie. En noewe prins: doot 't zoeë wie des se 't zelf wilt doen, det is mien advies en den is 't allicht good.

Höbs dich nog get op dien hert Luuk?

Vorst Henri, bedanktj veur de appeltaart enne koffie, en as se vastzitst doen ich 't nog 'n jaor!

De Kwakel

Jaorgank 50

Get kleiner

May en Lowie haje al jaore zónne groeëte kunstkerstboom dae se eder jaor inein zètst. Ze wore det meug en woeëje 'ne veul kleinere. Wie Petra det huurdje woeëj zie dae aoje waal euvernumme veur bie de Prairie nieër te zètte.

Dus det kwaam good oet en koste May en Lowie nao Van Cranenbroek haer óm 'n noew buimke. Det is 'n groeëte zaak en as se zoogst waat dao allemaol bie-ein sting aan keus zoeëts se haost sjrik kriege óm d'r eine oet te zeuke. Det waas dus al moejlik zat en as d'r den ouch nog nemes rónjdlöptj dae kumtj helpe mèt get advies gaeve den weurs se óngedöldjig. Oppe door wore ze 't wachte en rónjgape meug en koze ze mer 'ne boom dae heur good leek. Ze kochte d'r ouch nog noew lempkes bie want die aoj wore neet sjoëen mieër.



Überraschung, überraschung

"Daaaaar wordt aan de deur geklopt..." Eder jaor zoeë in 't begin van december haoje ze bie Beurskes eine pekskes aovendj. Ederein köptj get veur emes anges en ze doon den kado's veur €25. Den stèlt 't nog net get veur, kinse nog get gaeve woeë dae angere get aan heet. En pap sponsortj den ein bietje zoeë det ederein d'r aan mèt kan doon. Bowen haaj zien leutje getrokke en good wèggestopt zoeëdet t'r 't zeker neet kwiet zoeëj rake. Wie d'r óm ein kado oetmost twiefeldje hae nog effe mer toen wist ter 't zeker. Opa waas lang vorst gewaestj en dus zoeëj hae d'r in eder geval ouch eine roetekrabber bie doon. In 't gedicht kwam det natuurlik fijn trök. Ouch al wist hae de naam neet zeker, mèt ein algemeen kado zoj ederein blie zeen. Mer waat bleek? Hae haaj Jur. Waat waas dae blie mèt 't kado. Dao hób ich echt get aan as ich euver 'n paar jaor mien riebewies gehoordj hób. Überraschung, danke Sinterklaos.



Voetbalgek



Wim Tunisse is eine echte sportleefhóbbber en hae geit gaer 'n weekendje voetbal kieke. Den mós se dinke aan wèdstrieje as FC Barcelona tege Real Madrid en zoeë. Zoeë ging hae ouch ins nao Paris Saintes Germain. Lekker aete, tetrasje pikke en effe 't thoesfróntj laote wete det t'r d'r weer hieëlemaol klaor veur waas (heur get de ouge oet staeke). Hieël op zien gemaak leep hae richting Parc des Princes, 't voetbalstadion van dees beroemdje Pariese club. Blie wie ein wicht sting hae aan 't loket óm ein kaertje te koupe, wie hae d'r achter kwaam det de wèdstried 's middigs al gespeuldj waas. Hae is wersjienlik vergaete óm 't thoesfróntj det door te gaeve. Die huurdje det bie toeval pas ein paar daag later. "Jao mer wèt se waal waat det 't kostj óm vanoet Paries te belle."

Toen ze thoes det dink inein aan 't zètte wore meindje ze det ze extra reserve tek d'r bie haje gekregen. Dae boom waerdje mer groeëter en groeëter en oeteindelik waas d'r mer 30 cm kleiner as dae aoje! Ze wore dus neet veul opgesjote en wie toen ouch nog 'ns bleek det ze lempkes aan 'ne witte kabel haje gekochtj waas de stumming nog minder. "Laot dae boom mer veur waat 't is, mer 'ne witte kabel door 'ne greune boom det is niks," grauwendje May, "wae gaon nao Intratuin goje koupe." Oeteindelik is 't toch good gekómme en de kal geit noe det ze eder jaor 'ne noewe boom koupe toetdet ze d'r eine hóbbe mèt de huurdje die ze wille.

Sóms geit 't snel

Jan en Toos Leeters zatte heur hoes te koup en det waas snel verkocht. Sjoerd as noewe eigenieër blie en Jan en Toos blie want noe koste ze mèt ein geróstj hert nao Rooj. De spulle die ze achter móste laote, móst zoon Johan den mer nao de stort bringe. "Mer missjien kintj gae die op Marktplaats zètte det bringtj altied nog mieër op den de stort", zoeë waerdje gezagt en gedaon. Binne ein paar daag kwome de ieëste kiekers al. 't Waas zón succes det Jan en Toos alles snel kwiet wore, zoeë snel det ze mèt Kerstmis op twieë campingsteulkes móste zitte óm nao de toespraak van Willem Alexander te kieke. "Ich veuldje mich wie eine Jozef van Maria in de stal van Betlehem, mer den zónger os en ezel" mót Jan gedacht hóbbe. Waal alles zès waeke van te veure netjes kwiet en opgeruumdj. Neet ederein kan zoeë good plannen.



0495 55 19 95

www.scissorsenco.nl

Elle buurte mèt: De Kwakel

Jaorgank 50



Elly van Miet (Elly Verstappen-Custers)

Veurdet de Kwakel d'r waas zeen d'r mieër vastelaoves oetgaves gewaestj. De ieëste oetgave heet gewuuen "de Moeëreboek". Dao sjreve toendertied de Prins in, en de organisatie rónjdjóm de vastelaovendj. En menieër Pastoeër. Wie de redactie ging zeuke nao de ieëste Kwakel kwome wae oet bie Elly, want daovan wiste wae det zie zich in dae tied bezig heel mèt de Kwakel.



Redactie: Elly, kinse get vertelle euver die beginjaore?

Elly: Ich weit det wae in 1974 de jubileumoetgave hóbbe gemaaktj ómdet de Raod 22 jaor bestóng. Veur ós waas det 't 4e jaor det wae ós daoveur inzatte. Nellie van Driesse Harie, Nellie van Krane, Ellie van Pleunis, Lenie van Palme, René van Palme en ichzelf. Wae kwome in café Palme bie-ein en hieël dèk waas dao ouch Pierre van Berbe en Jantje van Meerte bie, die zootj dj'r ouch ins mótte vraoge.

Redactie: Wie ging det in zien werk?

Elly: In dae tied sjreve wae as Kwakelredaktie zelf alle stökskes, wae bedachte welke mupkes d'rin kóste, emes mook ein tekening, wae ging de middestenjers aaf veur ein vriewillige biedrage en ein advertentie. Dao waas emes dae oppe sjoeël ein stencilmesjien haaj en wae hoofdje allein mer de pepeerkoste te betale. Veul werk waas det. En det rape, det kón se dich neet veurstèlle. Mèt veer man rónjdjóm de biljaar loupe en van edere stapel ein blaedje aafrape. Achterop stóng d'r eine en dae paafdje dao ein paar nietjes in.

Redactie: Den haatj gae 'ne Kwakel, en toen?

Elly: Daonao verkochte wae zelf de Kwakel. Dae brachte wae hoes aan hoes. Dao wore toen net die zès bejaardewuuninge klaor oppe hook vanne Ribesstraot. De aojers van Zef Ruiten die woeëndje dao en ich weit nog det wae dao ane deur stinge wie de snieë toet ane knieje hoeëg laag. Van dao-oet kos se toet bie Sjaokes kieke, dao wore ze nog neet aan 't bouwe. Waal oppe Niesstraot en oppe Weigeliastraot. Dju waat hóbbe wae dèk ermood geleje.

Redactie: Is det altied zoeë gebleve?

Elly: Nae, naoderhandj ging det allemaol anges. Dao kwome get mieër meugelikhede, de techniek ging wiejer en wiejer. Mer wae wore d'r neet veur óm get euver minse te sjrive. Dao kwaam kal van en gevreigel en det woeëje wae neet. Langzaam mer zeker waerdje d'r get mieër ingezatte mer den nog hieël veurzichtig. En den meestal euver minse woeëvan se wist det ze dao tege kóste.

Redactie: Elly, wie lang hób se det Kwakelwerk gedaon?

Elly: Det weit ich neet precies mer wie Corrie en Huub en Thea in het comité kwome toen wist ich det 't zeker nog jaore zoeëj doorgaon. Toen bèn ich d'r mèt gestoptj. Ich gluif det ós Paul d'r toen bie kwaam. Det is róndj 2000 gewaestj, mer 't kan ouch get ieërder zeen gewaestj. Dao hób ich mich noeëts drök óm gemaaktj

Redactie:

Elly, bedanktj veur dit gesprek. Wae zulle ouch ins mèt Jantje van Meerte gaon kalle. Mer veur noe geit det neet mieër lókke.





Timmerbedrijf - Houthandel
W. STEUTEN BV

**voor al uw hardhouten
Kozijnen en Deuren**

Timmerbedrijf - Houthandel
W. Steuten BV
Grathemerweg 49B
6037 RN Kelpen-Oler

Tel: 0495-652178
Fax: 0495-651478
Mobiel: 06-53127981
www.steuten-timmerbedrijf.nl
winsteuten@hetsel.nl

Open van maandag t/m vrijdag van 07.00 - 17.00 uur.
En op afspraak.

De Kwakel

Jaorgank 50



Waat gebeurtj hie?

A: Ich kroep tot ich d'r bie nieërval

B: Waas dae raam ope?

C: Is dit ein moezeval?

D: Stormbaan veur seniore

Lekker en veul



Ruud en Marie-José ginge ein paar daag logere in ein luxe hotel.

's Mörges keke ze zich de ouge oet: zón oetgebrijdij ontbijtbuffet haje ze nog noeëts mètgemaakt. D'r sting zelfs ein groeëte kóm vol chocolade-mousse! 't Water leep Ruud al inne móndj en hae deej zich de kóm good vol. Lekker!

Totdet hae d'r bie de ieëste hap achter kwaam det 't chocopasta waas waat d'r zich haaj opgesjótj.

Veur eine appel en ein paer
gaotj gae nao
fruitbedrijf Moors
haer.



Surprise, Surprise

't Waas 5 december, de jónges van Beurskes haje d'r lang haer oetgekeke en zóngje oet volle borst: "Heerlik aaavondje is gekooome" Mickey, wietoet de braafste van 't stel, zóng 't helste van allemaol. Ze haje leutje getrochtj. Mèt de bus van 't werk ging Mickey snel ein surprise score bie Cranenbroek. "Weem höb se?" vroeg ziene collega. "Ós mam en ze kriegtj get sjoeëns. Eine kaersekandelieër en ich doon d'r ouch nog extra kaerse bie. Mam duit echt völ voor ós, die verdeentj det." 't Lot haaj beslistj det broor Jim as ieëste zien surprise mocht oetdeile. Dao waas drek commotie wie Jim zien surprise aan Christa goof. Jim hooldje 't leutje te veursjien: "Ich höb mam, kiek mer." "Nae, nae, ich höb mam" en vol euvvertuging paktj Mickey 't leutje oet zien beurs: 'Bowen'. "Nog ins ein echte surprise," zag Christa, "danke Sinterklaos."



Wisj dj`r al ...

- Det Siem nao Joost aan 't gaon waas óm ziene inkel weer gengig te kriege
- Det Joost zag det t'r röstig aan móst doon en neet móst euverdrieve
- Det Siem rónjdjverteldje: dae Joost heet veul minse kinnis
- Det d'r zeen die dao aan twiefele.

Nachtelijke trip

Lio van Frank en Connie werktj in Wieërt in 'n restaurant en dao kan 't waal 'ns laat waere as 't drök is gewaestj en ze mótte nog alles oprume. Frank of Connie gaon Lio den ophole want zón maedje zoeë laat allein heiwes laote gaon det is niks nateurlik. Op 'ne kieër waas aafgesproke det Connie heur zoeëj hole. Connie móst de volgendje daag weer vreug op dus die douchdje zich alvast en ging in heure pyjama nog effe oppe bank zitte wachte. "As 't allein effe op en nieër nao Wieërt is den trek ich mich neet mieër mien kleier aan," waas de gedachte. Mer 't doordje en 't doordje ieër det t'r 'ns ein telefoontje van Lio kwaam, 't waas zeker weer drök in die tent. "Wèt se waat," dacht Connie, "ich riej alvast nao Wieërt en tege dae tied is Lio waal klaor mèt wirke." Zoeë gedacht, zoeë gedaon, ze sjoot zich nog 'ne extra badjas aan en wèg waas ze. Mer dao aangekómme doordje 't nog steeds lang en Connie heel 't neet mieër. Waat waas t'r toch ane handj? Dus ze keek 'ns stiekem óm zich haer of t'r minse inne buurt wore. Nemes te bekinne dus oet de auto en oppe tieëne leep ze nao det restaurant.

Dao deej ze verzichtig de deur ope en gelökkig waas Lio vlakbie. "Pssst... Lio... Lio... bès se haost klaor? Ich wacht al boete!" Lio zaag heur moder dao mèt heure badjas inne deur staon en zag mer snel det ze bienao klaor waas. Dus Connie mer weer as 'ne haas trök nao de auto en nog effe wachte. Gelökkig haaj verder nemes det tafereeltje gezeen.



MIJN BUURT MIJN SPAR

SPAR DERKSEN
SEBASTIAANSTRAAT 12
6011 RE ELL 0495-551285




De Kwakel

Jaorgank 50

Stipt te laat

Sinte Merte veel aafgeloupe jaor op eine dinsdig en 't KVV organiseerdje 't stoke en oliebolle aete op de daag zelf. Marianne heet op dinsdig tennisles, mer woeëj mèt zoon Cas toch effe nao de houp gaon kieke. "Och, wèt se, de tennisbaan liktj naeve 't trapveldje dus ich pak mien spulle gewuuen mèt." 't Waas gezellig en drök bie de houp en Marianne vertèldje det ze heur racket neet haaj mètgepaktj óm op te stoke, mer det ze óm acht oor tennisles haaj. Effe veur acht nóm ze aafsied op 't veldje leep wiejer. Oppe tennisbaan wore ze alvast begóst mèt zich werm te houwe. Of begóst de les toch al óm half acht?



Zeuk de 11 versjille



Jelle oppe helle

't Waas dónderdigaovendj en same mèt eine kameraod ging Jelle op stap in de stad. Noe is de stad zoeë groeët det ze dein en danger oet 't oug verlore. Mer det mocht de pret neet drökke, hae amuseerdje zich en de tied vloog veurbie. Wie d'r 't waal zón bietje gezeen haaj ging hae trök nao 't appartement. Ziene kameraod waas d'r nog neet, dus Jelle zat zich veur de deur oppe mat, zoeëdet t'r gein kaof vot kreeg. Al snel veel hae in slaop en droumdje van de sjoëne aovendj. Nao ein paar eurkes waerdje hae wakker gemaaktj mèt de vraag: "Woeërom höb se dich neet in béd gelagtj, de sleutel liktj ónger de mat!"

De lift.

O(s)pel

Vrinjegroep de Platvèsse ging ein weekendje nao Staevesbeek. Ein collegaetje van Marie-José waas dao pas gaon woeëne en ze stèldje veur óm dao ins langs te loupe. Ze wist neet precies woeë 't waas, mer 't dörpke is zoeë klein, det zoeëje ze gemekkelik vinje. Ze vroe 'n paar minse die ze op straot tegekome, mer helaas zónger resultaat. Tot Marie-José 't zaag: "Dao woeëntj ze! Kiek mer, dae auto kumtj oet Ospell!" 't Doordje effe veurdet de rest vanne vroulje biegekómme waas van 't lache veurdet ze koste oetlègge det ze eine Opel aanwees.

Matje van Winkelmole ging verhoeze en haaj de traktor enne ker klaor staon. Hae haaj zich ouch get men geregeldj die kwome helpe mèt sleipe. Jesper van Kessels ging nao de middig ins kieke wie det 't d'r mèt opsjoot. Bie 't noew hoes aangekómme vroeg d'r aan Tjeu woeë die men oethinge. "Die zitte vast inne lift", antjwoordje Tjeu. Jesper lachdje en keek get rón dj. Nao 'ne twieëdje kieër veurzichtig te vraoge woeë ederein toch waas, zagt Tjeu weer: "Det zeg ich net, die zitte vast inne lift!" Jesper wist neet waat hae d'r van most geluive en zat ein berichtje oppe groepsapp: "En Mat, zit se vast inne lift jóng?" "Ich neet!" reageerdje Mat. Effe later steurdje Jochem: "Mer ich waal."

Antjwoorde 't versjille:
 1. Pluin achterste muzikant 2. Muzieknoten achterste mapje muzikant 3. Stang trombone oranje kleur voorste muzikant
 4. Embleem muts voorste muzikant 5. Fupiter voorste muzikant 6. Embleem moerebuuk trom 7. Scharnier trom 8. Toeter voorste muzikant 9. Stiksel jas achterste muzikant 10. Knoop jas voorste muzikant 11. Trombone lengte achterst muzikant

De Kwakel

Jaorgank 50

Mark wiltj ouch ins get anges

Toos, as eder seconde teltj



Op vastlaoves dinsdig inne mörge zaat bie Siem de café vol. 't Waas d'r gezellig en ouch Toos van Thijs waas dao. D'r waerdje eier gebraoje en Siem zoj Siem neet zeen as hae neet eine Buutereedner geregeldj haaj. Wie de buuteman oet de gooj kamer kwaam, begós hae geliek te kerme en grieptj mèt zien handj nao ziene borst. Toos heet good opgelètj bie de AED cursus en kumtj drek in actie, ze wètj det eeder seconde teltj. "Maak dich toch neet zoeë drök" zeet dae buuteman, "dit huuertj bie mien act!"



Fotocursus

Eine facebook fotograaf meuktj op fieëstjes gaer foto's vanne minse. Ederein is dao gek op want 5 minute later kinse den oppe iPhone zeen desse dich aan 't amusere bèst en det waas noe net woeë se pas nog aan twiefeldes. Noe haaj Roy bedacht det 't missjien waal good waas as hae ins eine korte cursus zoeëj gaon volge. Óm nog mieër en nog baeter foto's te kinne make. Aan 't begin vanne cursus vreugtj de docent: "Woeë kin se eine goje fotograaf aan kinne?" Gein antjwoord vanne deilnummers. "Eine goje fotograaf numtj zich de tied, meuktj 1 gooj foto en is den klaor." De rest heet hae d'r neet bie hove te zègge, Roy wist genógt.

Eine noewe chauffeur

Marleen, Nikki en Anne wore op weeg nao Sittard, tied veur 'ne gezellige meide-daag. Anne haaj sinds kort heur veurluipig riebewies en mocht rieje. Einmaal oppe snelweeg waas ze get aan 't póngele mèt sjakele, krrrr, krrrrr ... "Anne, waat bes se toch aan 't doon?" "Jeh, 't löktj gewuuen neet." Waat bleek, ze probeerdje nao de zès te sjakele, t'rwiel d'r mer vief versnelinge wore. En in de achteroet zètte oppe snelweeg mèt 130, **det wirkjt neet nae...**

Naeve dien sjoon loupe

Leon van Toon van Aere Drees deej in 2014 weer mèt ane Bóntje Aovendj. Hae speuldje de rol van Monseigneur in 't stök van Vals Plat. Monseigneur zeen is ein belangrieke rol, dus heet Leon zich hieël netjes aangedaon. Hae steit d'r gekleidj op in zien zwart pak. 's Zaoterdigs geit t'r zich achter de colisse weer ómkleie (eine Monseigneur duit det neet inne kleidkamer woeë ederein zich ómklètj) en zuut det t'r al ein paar daag mèt 2 versjillendje sjoon oppe bühne heet gestange. Waal allebei zwart mer toch dudelik versjillendje sjoon. "Mèt mien talent haaj ich baeter naeve mien sjoon kónne loupe, dan in twee versjillendje" waas zien spontaan reactie.

Ze ginge örges lekker oet aete ómdet 't d'r bie huuertj asse op vakantie bèst. Eva woeë kibbeling en hae gundje heur det. Bie 't derdje restaurant haje ze kibbeling op 't kinjermenu staon. "Det is waat ich wil" Eva besteldje zich 2 porties kinjermenu. Mark haaj zin in ein lekker stök vleis. Deze kieër geine biefstök of haas van 't verke. Hae woeëj ins get noets probere. "Wat is vandaag de tip van de dag?" "Dat is de dorade meneer." "Dju, eine mixed grill, lekker vleis, dao hób ich zin in" zeet t'r en besteldj tjr ein glaas beer bie. Ieëst kwome de 2 porties kibbeling veur Eva en Mark sjaamdje zich ein bietje veur zien vrouw die 2 kinjermenuutjes haaj besteldj. Toen kwaam "de dorade voor meneer". "Getfer derrie, det aet ich neet, det is vès, trök daomèt inne zieë, bah, doot mer rechtstreeks inne klike" (greune afvalcontainer). Eva ging nao de bedeenster haer en regeldje det de vès wègging en Mark spareribs kreeg mèt friet en mayonaise. Dju det waas lekker.



Thijs Koolen
Beste Echte Bakker
van Nederland

Winkelmolen v.o.f.
MEUBEL- & TIMMERWERKEN

Hooftstraat 36a
6011 RZ EH
Telefoon: 0495 551619
Mobiel: 06 23 615 405
E-mail: kwinkelmolen@planet.nl

Wisj dj`r al ...

- Det bie Peter van Jan van Stien eine sjoëne zebraaad is gekómme
- Det dae dao noe liktj ómdet d'r ieëst geine laag en det waas laeves gevaorlik want den mósse zelf as vootgenger oetkieke mèt eu verstaeke
- Det de dames die gaon kiene noe pas echt mótte oetkieke mèt euverstaeke.

De Buurtsuper

Neet te misse, de buurtsuper. In Èll is det neet allein ózze super Spar, mer ouch de super bekker en de super slegter. Super plekke óm te winkele en super plekke óm te buurte. Num noe "de vergaete boeëdsjappe". Emes dae dezelfde daag gauw efkes trök geit óm nog get te hole. Det zoeëj neet snel gebeure as se nao 'n anger dörp zoeëts mótte gaon. 't Record steit geluif ich op veer kieër trök op eine daag, ómdet 't zoeë kei-henjig is. Wiezoeë thoese aorjwètse boeëdsjappe-breefkes sjriev? Det is oet de tied! En gezellig is 't, zeker op zaoterdig as 't get drökker is. Minse kómme zich tege as ze vanne bekker of slegter aaf kómme of angesóm.

Waat meuktj 't oet as ze den get óngelökkig op of ane straot staon. Of snel de auto get sjeif parkere. 't Verkieër inne Sebastiaanstraot hêltj dao al jaore raekening mèt door langzamer te rieje. Of as emes zich zitj oet te röstte op de "Oranje bank" bie Siem, den geis se dao efkes naeve zitte en get zeivere. Zeker as det 'ne wanjelicieër oet Hollandj is, die vinje det GGGezelliGGG. Op zón moment is 't gaaroet neet belangriek of diene fiets inne weeg steit. Det weurdj geaccepteerdj óm det stökske centrum van Èll intact te haoje. Meindj gae det ze bie de Spar de tent toegoeëje ómdet d'r eder jaor weer van die minse zeen die kómme jatte of inbraeke via 't daak? Niks d'rvan! Röstig blieve, lang daag make en hel doorwirke óm de zaak aan 't dreije te haoje. Super bedanktj óngernummers, wae gaon allemaol baeje det gae blieftj!

Pam

Wildj in Èll

Ellske meuktj zich zörg euver de toename van het wildj in ós dörp. Bie Tjeu en Jeanny kwaam eine marter en dae ging in de hoonderren te kieër: Drie ginge d'r plat, nek aafgebete en blood opgezoge. Hoeëg hêkwerk d'r ómhaer gezatte en gein last mieër van gadj. Op versjillendje plaatse heet eine vos aenje en kriele lèstig gevalle. Det maag neet! Det heet noeëts gemoge, dus ouch eine vos maag det neet. Bie Böskes (baeter gezagtj bie Wim Steute) hoestj ein otterechtbaar die buim aafsjele en mèt tek sleipe, die dao dus ein zootje make. Inne zaal heet Toos van Peet van Sjr ratte zeen loupe. Euveral ligge keutele en niks zelf oprume. Rieëje, haze en knien zeen d'r ouch weer zat. Noe bliektj det d'r deze herfst wilj verkes hóbbe róngeloupe door de meis. Groeëte stökke verneeldj, kolve aangevraete mer waal laote ligge en toen de asperges is ómgevreutj. 't Wachte is noe op 'n wilj gaos die dees bieëste wiltj lieëre zwumme.

Ellske

't Mót neet gekker waere, Èll kriegtj mich toch ein aandacht van die vanne gemeidje. Allemaol verbaeteringe, soms waal drie of veer op ein waek tied op dezelfde straot.

Oppe Antoniusstraot haje de minse probleme mèt det vrachtverkieër, mèt de auto's oppe stoep, minse van 't Meuleveldj en vanne Hoeëgstraot die veul te hel rieje as ze nao 't waerstation in Haler gaon of as ze van Rooy weer heiwes kómme. Dus dao kwaam inspraok, dao kwome fiets stroke, dao kwome päöl, det ging weer wèg, det kwaam weer trök, det ging weer wèg en noe steit d'r toch get sjoëns! Ze zeen d'r echt hieël content mèt oppe Antoniusstraot. En ouch weer veul verbaeteringe op ein stökske Steenenbamp. De straot verhuuegtj, graas aangelagt en parkeerplaatse gemaaktj. Zoot d'r good oet en misjien, euver twieë jaor as d'r weer verkezinge zeen, kómme ze trök óm ouch de Paulsstraot op te knappe.

Ellske

Kritisch, sjerp en oplèttendj. Det is Ellske. Dees aor tante duit op heur eige meneer

verslaag van
waat ze
zoeë-al hie
inne buurt
heet gezeen
of gehueerdj.



Wisj dj'r al ...

- Det Harrie, de jager van oppe Bös, ins oppe oetkiek ging zitte óm get te doon ane euverlast die de wilj verkes bezörgdje ane meis en de asperges
- Det hae eine nachtkieker en eine verrekieker bie zich haaj en waal toet in Swartbrook kóst kieke waat d'r allemaol aan wildj leep
- Det hae waal get huurdje knorre mer neet inne gate haaj det de verkes ónger ziene oetkiectore door lepe
- Det hae daovan twieë nachte neet heet kónne slaope
- Det die verkes waal blie wore det Harrie in bèd laag en neet oppe tore zaat.

De Kwakel

Jaorgank 50

Kinjerkal



Christianne ging sjoppe mèt Indy (5), mer die lèste waas neet van plan òm bie de Action oet te auto te kómme. "Nee mama, hier zijn helemaal geen geitjes. Jij had gezegd dat ik een geitje mocht uitzoeken!" "Nae ich zagt ein kleinigheidje, gein geitje." "Oh, oké dan..."

Same mèt oma Lenie haaj Ize (3) Lynn nao sjoeël gebracht. Oppe trök-weeg sting Toos van Thijs boete en ze haje drek kal. Ize vónj al snel det 't get lang doordje en herinnerdje heur: "Oma kóm! Doe wèstst toch det ich 's middigs nog móts laope!"

Veur de kerstmertj waerdje ein paar daag geknutseltj oppe sjoeël. Aart (5) waas hieël enthousiast aan 't vèrve wie d'r inins bedinktj: "Eej Rianne, ich doon 't noe al veur de tweedje kieër mèt dich, dees waek!"

De deur plat geloupe

José van Thei Beurskens leet wete, det zoeë-as eder jaor mèt vast-elaovendj de jeugd bie heur kóst kómme aete. Op maandigj kwaam Pascal mèt zien vrinj en op dinsdig Dion mèt die van hum. José huurdje van dinsdig op woonsdig niks dus dacht ze "Heh, heh, eindelijk hóbbe ze ein anger kosthoes gevónje." Mer óm 5.30 oor kwaam 't gespoes toch nog nao binne. Nao 't aete móste d'r 'n paar ouch nog nao de wc. Ze wiste neet mieër wie de deur ope móst, dus hooldje ze de hieël deur d'r mer oet. Nou jónges, as dj'r uch dit jaor ouch zoeë netjes gedraagtj den zeet dj'r weer welkom.

Noew parkeerplaatse wore hel nuuedig

Al jaore parkere de minse de auto's oppe Sebastiaanstraat inne buurt vanne winkels naeve de straat, gewuuen naeve stoep, netjes ane kantj. Mer eine oplèttendje ambtenaar haaj gezeen det d'r gein parkeervakke wore aangegaeve. Det zoeëj neet lang good kinne gaon dus dao kwaam ein plan, dao kwaam geldj, dao kwome wirkers en dao waerdje aangepaktj. Mèt as resultaat: parkeerplaatse dao woeë ieërder de auto's naeve de weeg stinge. Eine veuroetgank det wil se neet wete. "Doon ze ins get waat geine zin heet, is 't weer neet good."



Veurzichtig mèt de trapleier

Miny Goldenbeld sting afgeloupe jaor ein paar kieër inne belangstèlling. Vanwege Dick zien óngersjeiing van Keuning Willem en 50 jaor getrouwdj mèt Dick. Mer Miny kan ouch nao die 50 jaor nog good get werk verzètte inne tuin. Dae middig woeëj ze de klimop get fatsoeneren en bieknippe. Ze kruuptj op 't leierke mer det is al ein paar jaor neet mieër oppe keuring gewaestj. Ein van de sproute kraktj door en Miny liktj hieël óngemèkkelik tösse blome, leierke en klimop. De snoeisjieër nog in ein handj en mèt die anger handj de rok omlieëg haoje want dao kwaam de windj ónger. "As mich noe mer nemes zuut ligge, ich zal Dick ins rope." Gelökkig waas Dick inne buurt. "Jao, anges haat se motte wachte toet Hein van Seunis ging sjofefe in ziene volkstuint. Dae haaj dich ouch waal geholpe." "Mer Dick, zoeë erg weidje dae rok toch neet omhoeëg, of waal soms?" "Volgendj jaor laot ich veur de zekerheid toch mer weer de trapleier keure. Veur se 't wèstst, gebeure d'r gekke dinge."

CUE
SUPPORT

Als gae ein gooj, en professionele, audiovisuele oplossing zeuktj, help ich uch gaer

Roger Creemers
0495 - 586260 | 06 28230498



Sjaamdje óm niks

Riet van Dijk waas nao Belsj gegange óm te tanke. Det ging good toet det ze van achter waerdje aangereje. Resultaat; de auto flink inein en dao kost ze neet mieër mèt wiejer. Mer geine noeëd, det van dae auto waerdje geregeldj en de Belsje plies booj aan óm Riet heiwes te bringe. Riet vónj det good mer zagt tege de plies det ze heur oppe Hoeëgstraat d'roet móste laote, det lèste stökske zoeëj ze waal loupe. Riet waas bang det de minse zoeëje zeen det de plies heur aan thoes bie Niesgoet zoeëje afzètte en zich daoróm óngeröstj ginge make. Jeh Riet, wae zulle 't nemes verder vertèlle, mer zoeë hoofjt gae uch toch neet te sjame nao zoeëveul pech.

Doan eur veut pien inne schoan,
dan kint ge bie Bep, Bianca, Jantien of Evi de veut loate doan!

Medisch Pedicure Bep van Oosterhout



Scheijmansplein 5, Ell / St. Willibrordusstraat 10, Nederweert
Bel vur un aafspraak noa; 0495 55 23 64 of 06 5435 8227

De Kwakel

Weurdje vanne redactie

Opnoew höbbe wae ós bèst gedaon óm deze Kwakel veur uch klaar te krieger. Sòms waas 't echt zeuke, want dao kómme neet hieël veul verhäölkes via de kwakelbösse binne. Wae móste 't zónger Jeanny vanne Kaolder doon en det waas ein gemis. Die heet gooj oeëre want die huurdje altied vanalles. Mèt plezeer höbbe wae dit jaor toch weer zat pagina's vol gekrege. Missjien is neet alles besjreve zoeëwie 't precies heet gegange. Wae wore d'r neet altied zelf bie en höbbe veul van huure zegge. En gae wètg wie minse dèk zeen. Die make van eine sjeet sòms eine dónderslaag. En den is t'r op 't lèst toch weer eine Kwakel vol.

Paul van Miet, Nicol Orbon, Bram Camp, Rianne Goldenbeld en Jos van Lemme.



Bakkerij Thijs Koolen

Centrum 'New Life'

Wim Steuten

Spar Derksen

Landgoed Lemmenhof

UGV Henderikx

Winkelmolen timmerwerken

Jan Custers Taaladvies

Garage Heemels

Linders kwekerij

Bep van Oosterhout

Eva Strous Logopedie

CUE-Support

Slagerij Heijkers

Peter vd Eertwegh

Nicole Moors fruitbedrijf

Scissors & Co

Eetcafé De Prairie



CV de Moerebuuk
Januari 2015, Jaorgank 50

Vastelaovendj 2015
www.moerebuuk.nl

De Kwakel is ein oetgave
van 't Kwakelcomité